



Na osnovu čl. 7. i 8. Zakona o ministarskim, vladinim i drugim imenovanjima („Službene novine FBiH”, br. 12/03, 34/03 i 65/13), člana 102. stav 2. Zakona o zdravstvenom osiguranju („Službene novine FBiH”, br: 30/97, 7/02, 70/08 i 48/11), kao i tačke I i III Odluke o kriterijima za imenovanje u upravna vijeća u oblasti zdravstva („Službene novine FBiH“, br. 35/04 i 33/10), Ministrica zdravstva Kantona Sarajevo, raspisuje

JAVNI OGLAS
ZA NOMINIRANJE/IMENOVANJE NA POZICIJU U UPRAVNOM ODBORU
ZAVODA ZDRAVSTVENOG OSIGURANJA I REOSIGURANJA FEDERACIJE
BOSNE I HERCEGOVINE

1. Oglašava se pozicija u Upravnom odboru Zavoda zdravstvenog osiguranja i reosiguranja Federacije Bosne i Hercegovine (u daljem tekstu: UO ZZOIR FBiH), i to jedan (1) predstavnik iz Kantona Sarajevo.

2. OPIS POZICIJE:

UO ZZOIR FBiH u smislu člana 104. Zakona o zdravstvenom osiguranju:

- utvrđuje program djelatnosti Federalnog zavoda osiguranja i reosiguranja i daje smjernice za funkcioniranje Stručne službe Federalnog zavoda osiguranja i reosiguranja,
- donosi statut Federalnog zavoda osiguranja i reosiguranja, uz saglasnost Parlamenta Federacije i druge opće akte,
- donosi finansijski plan i usvaja završni račun Zavoda,
- razmatra probleme u vezi sa osiguranjem sredstava za provođenje obaveznog zdravstvenog osiguranja i reosiguranja na teritoriji Federacije Bosne i Hercegovine i predlaže odgovarajuće mjere,
- donosi projekciju sredstava neophodnih za sprovođenje obaveznog zdravstvenog osiguranja,
- utvrđuje prijedlog Pravilnika o osnovama, kriterijima i mjerilima za zaključivanje ugovora o proširenom zdravstvenom osiguranju,
- donosi opći akt o osnovama za utvrđivanje cijena sa cjenovnikom zdravstvenih usluga iz osnova obaveznog zdravstvenog osiguranja,
- usvaja obračune u skladu sa Zakonom o zdravstvenom osiguranju i dostavlja ih Parlamentu Federacije na razmatranje,
- donosi finansijski plan federalnog fonda solidarnosti,
- priprema Prednacrt odluke o utvrđivanju prioriternih vertikalnih programa zdravstvene zaštite od interesa za Federaciju Bosne i Hercegovine i prioriternih najstrožijih oblika zdravstvene zaštite iz određenih specijalističkih djelatnosti koji će se pružati osiguranim licima na teritoriji Federacije Bosne i Hercegovine, kao i Prednacrt odluke o kriterijima i načinu korištenja sredstava fonda solidarnosti Federacije Bosne i Hercegovine,
- raspoređuje sredstva federalne solidarnosti po utvrđenim namjenama,
- prati izvršenje prihoda i rashoda federalnog fonda solidarnosti i o tome dostavlja izvještaje kantonalnim zavodima zdravstvenog osiguranja i Federalnom ministarstvu zdravstva svaka tri mjeseca,
- donosi odluku o raspisivanju tendera za nabavku potrošnog materijala i lijekova i imenuje komisiju za provođenje tendera i izbor najpovoljnijeg ponuđača,
- utvrđuje ugovore koje Federalni zavod osiguranja i reosiguranja zaključuje sa zdravstvenim ustanovama za pružanje zdravstvenih usluga, koje se finansiraju iz sredstava solidarnosti i prati njihovo izvršenje,
- donosi i druge akte neophodne za poslovanje federalnog fonda solidarnosti,

- razmatra izvještaj o provođenju obaveznog zdravstvenog osiguranja i reosiguranja na teritoriji Federacije Bosne i Hercegovine i izvještaj o radu Stručne službe,
- razmatra izvještaj o provođenju međunarodnih ugovora o socijalnom osiguranju u dijelu koji se odnosi na obavezno zdravstveno osiguranje,
- razmatra izvještaj o ostvarivanju zdravstvene zaštite u inozemstvu,
- priprema prijedloge akata iz obaveznog zdravstvenog osiguranja i reosiguranja, koje u skladu sa zakonom donose federalni ministar zdravstva odnosno Vlada Federacije,
- učestvuje u pripremi za zaključivanje međunarodnih ugovora o socijalnom osiguranju u dijelu koji se odnosi na obavezno zdravstveno osiguranje,
- vrši i druge poslove za koje je ovlašten zakonom, podzakonskim, općim i drugim aktima.

UO ZZOIR FBiH može obrazovati odbore i komisije za izvršavanje određenih zadataka.

Člana UO ZZOIR FBiH iz Kantona Sarajevo kandiduje Vlada Kantona Sarajevo, na prijedlog Ministrice zdravstva Kantona Sarajevo, a konačno imenovanje vrši Vlada Federacije Bosne i Hercegovine, na prijedlog Federalnog ministra zdravstva. Mandat članova upravnog odbora traje četiri (4) godine.

3. UVJETI KOJE TREBA DA ISPUNJAVAJU KANDIDATI:

Kandidati koji se kandiduju za poziciju u UO ZZOIR FBiH dužni su ispunjavati opće i posebne uvjete, i to:

3.1. Opći uvjeti

- da je državljanin Bosne i Hercegovine (dokaz: uvjerenje o državljanstvu ne starije od šest mjeseci),
- da je stariji od 18 godina (dokaz: rodni list, ili ovjerena fotokopija rodnog lista ili ovjerena fotokopija lične karte CIPS-a ne starije od šest mjeseci),
- da nije otpušten iz državne službe kao rezultat disciplinske mjere na bilo kojem nivou u Bosni i Hercegovini u periodu od tri (3) godine prije dana objavljivanja ovog oglasa (dokaz: izjava kandidata potpisana i ovjerena od strane nadležnog organa),
- da se na njega ne odnosi član IX.1. Ustava Bosne i Hercegovine (dokaz: izjava kandidata potpisana i ovjerena od strane nadležnog organa),
- da nije na funkciji u političkoj stranci, u smislu člana 5. Zakona o ministarskim, vladinim i drugim imenovanjima Federacije Bosne i Hercegovine (dokaz: izjava kandidata potpisana i ovjerena od strane nadležnog organa),
- da nije izabrani zvaničnik, nosilac izvršne funkcije ili savjetnik u smislu Zakona o sukobu interesa u organima vlasti u Federaciji Bosne i Hercegovine (dokaz: izjava kandidata potpisana i ovjerena od strane nadležnog organa),
- da nema privatni – finansijski interes u ZZOIR FBiH u čiji se upravni odbor kandiduje (dokaz: izjava kandidata potpisana i ovjerena od strane nadležnog organa),
- da nije osuđivan za krivično djelo nespojiv s dužnošću u UO ZZOIR FBiH (dokaz: uvjerenje izdato od nadležnog MUP-a – Uprava policije),
- da nije direktor zdravstvene ustanove odnosno zavoda (dokaz: izjava kandidata potpisana i ovjerena od strane nadležnog organa),
- da nije član ni u jednom upravnom odnosno nadzornom odboru ustanove odnosno privrednog društva sa većinskim državnim kapitalom (dokaz: izjava kandidata potpisana i ovjerena od strane nadležnog organa).

3.2. Posebni uvjeti

- da ima završen VII stepen stručne sprema pravnog, ekonomskog, odnosno zdravstvenog usmjerenja (dokaz: diploma odnosno uvjerenje o diplomiranju),
- da ima najmanje pet (5) godina radnog iskustva u poslovima svog stručnog naziva, odnosno poslovima zdravstvenog osiguranja (dokaz: potvrda o radnom iskustvu) i
- da ima stručno znanje iz djelatnosti Zavoda zdravstvenog osiguranja i reosiguranja Federacije BiH, te da je upućen u sadržaj i način njegovog rada (dokaz: izjava kandidata potpisana i ovjerena od strane nadležnog organa).

Kandidati su dužni uz prijavu, koja sadrži kraću biografiju, adresu i kontakt telefon, priložiti originalne dokumente ili ovjerene fotokopije dokumenata ne starije od 6 mjeseci, kao dokaz o ispunjavanju općih i posebnih uvjeta traženih ovim oglasom.

Prijave sa traženim dokumentima se dostavljaju lično ili poštom preporučeno, sa naznakom "PRIJAVA NA JAVNI OGLAS - UO ZZOIR FBIH – NE OTVARAJ" na slijedeću adresu: Ministarstvo zdravstva Kantona Sarajevo, ul. Reisa Džemaludina Čauševića br. 1, Sarajevo.

Prijave koje ne sadrže propisano iz ovog oglasa, kao i prijave podnesene istekom roka utvrđenog u ovom oglasu, odbacit će se kao nepotpune, odnosno neblagovremene, te se kao takve neće uzeti u razmatranje.

Oglas ostaje otvoren 15 dana od dana posljednjeg objavljivanja, a isti će biti objavljen u „Službenim novinama FBiH“, u dnevnim novinama „Oslobođenje“ i na web stranici Ministarstva zdravstva Kantona Sarajevo: <http://mz.ks.gov.ba>

Svi kandidati koji budu stavljeni na listu sa užim izborom, biće pozvani na intervju pred Komisijom za izbor.

Prije intervjuja kandidati su dužni dati podatke o ranijim neposrednim rukovodiocima od kojih se mogu dobiti preporuke i informacije.

Bilo koji kandidat odnosno član javnosti može podnijeti prigovor na konačno imenovanje u skladu sa Zakonom o ministarskim, vladinim i drugim imenovanjima Federacije Bosne i Hercegovine.

Nakon završene procedure imenovanja, prijava i dokumentacija se neće vraćati kandidatima koji su aplicirali na ovaj javni oglas.

MINISTRICA
Prim. dr Emira Tanović - Mikulec s.r.



web: <http://mz.ks.gov.ba>
e-mail: mz@mz.ks.gov.ba
Tel: + 387 (0) 33 562-104, Fax: + 387 (0) 33 562-243
Sarajevo, Reisa Džemaludina Čauševića 1

